


MUSICA

WALES VS. SCOTLAND: U BAND NOVA CUNTER VEGLIA

da H.


Tgi che gudogna quest duel è atgnamain vaira equal. Fatg è però: «People In Planes» e «Biffy Clyro» han prendì in ord l'auter il Fri-Son. Apocalipsa? Però total!

Avant che vegnir tar il concert, qua in pèr datas per che vus sappias da tgi ch'jau discur: People In Planes han cumenzà il 2003 a far musica – almain sut quest num. Ils 5 Valis han prendì a cor da perfecziunar lur stil dad indie rock e l'han transferì en sferas novas. Els cumbineschan ils tipics riffs da ghitarra cun novs beats e surdattan dapli paisa al keyboard. Uschia daventa la musica greva. Uschè pesanta ch'igl è perfin daventà in zic sentimental en (paucs) muments dal concert. En ils gronds muments als èsi però grategià da pigliar il public oravant tut pervia da la vusch perfetga dal chantadur Gareth Jones. Insatge uschè



perfetg n'han ins anc mai vesì tar blers concerts. Savens èsi tuttina uschia: ins cumpra in disc, l'adura, vesa ch'il chantadur vegn en Svizra, siemia emnas avant il concert da quel eveniment e lura, cura ch'igl è uschè lunsch: l'apocalipsa persunala. Tge? sa dumond'ins, quai na tuna betg suenter la vusch sin il disc. 40 hebels per il giat e la dunna sper tai è gia svanida. Tge dianter! En mes cas è quella saira restà mes ami sper mai e nun ha bandunà il concert. Per fortuna per el e per mai. Che questa ediziun da Punts va sut il titel «apocalipsa» correspunda al mussà da Biffy Clyro. I n'è betg mo stada la musica ch'ans ha stratgs giu bass en la terra datiers a l'enfiern, mabain era sia cumparsa sco uman. Chavels lungs, barba, chautschas stretgas, il corp sura niv, ornà cun tattoos e la ghitarra tegnida stretga vi da ses corp sco sche sia vita fiss dependenta da quella. La forza da lur musica ans ha stra-

tga en in'extasa. Per il corp n'hai dà nagin fermar pli. El era sut la controlla dals beats da la batteria, da la vusch da Simon Neil e dals riffs brutals che quel ha sunà sin sia ghitarra. Qua hai jau chapì pertge che blers pensan che Biffy Clyro saja in acronim per Big Imagination For Feeling Young 'Cos Life Yearns Real Optimism. Gronda imaginaziun per il sentiment dad esser giuven, perquai che la vita desiderescha optimissem real.



H. aka Adrian Stecher (24) è student da scienzas da media e comunicaziun a Friburg. Il plaschair per la musica al ha gia tschiffà d'uffant. Il bab è organist e la mamma sunava excellentamain la flauta, uschia ch'el ha sunà sur blers onns il triangul. Per el è musica insatge che unescha, perquai na pudess el betg imaginar ina vita senza musica. Per las PUNTS va el a la tschertga da novas bands naziunalas ed internaziunalas e rapporta da concerts, albums ed experientschas fatgas cun la musica. Per il Radio Rumantsch moderescha Adrian tranter auter mintga segunda sonda la parada da hits.